

ଥେସଲନିକୀୟମାନଙ୍କ ନିକଟକୁ ପାଉଲଙ୍କ ଦ୍ଵିତୀୟ ପତ୍ର ଥେସଲନିକୀ ବିଶ୍ଵାସୀକତାଃତେ ପ୍ରେରିତ୍ ପାଉଲୁସ୍‌ଆଃ ଏଟାଃ ଚିଟାଉ ପାରିଟାଏ

ପ୍ରେରିତ୍ ପାଉଲୁସ୍, ଥେସଲନିକୀ କାଲିସିୟାତେ ଆତଃମିଆଁଦ୍ ଚିଟାଉ ଅଲ୍ଲାକାଦାଏ, ୧:୧ । ଥେସଲନିକୀ କାଲିସିୟାତାଃ ପାହିଲ୍ଲା ଚିଟାଉ ଅନଲ୍ରେୟାଃ କାଟିଃ ତାୟମ୍ତେ ଶ୍ରୀଷ୍ଟ୍ ଜାନାମ୍ ତାୟମ୍ ୫୧ କରେ ନେ ଚିଟାଉକେ ଅଲ୍ଲାକାଦ୍ ତାଇକେନା । ପାଉଲୁସ୍ ଚିମ୍ତା କରିଛି କାଲିସିୟାରେ ତାଇକେନା ଇମ୍ତା ନେ ଚିଟାଉ ଥେସଲନିକୀ କାଲିସିୟାତେ ଅଲ୍ଲାକାଦ୍ ତାଇକେନା । ଇନିଃ ବାର୍‌ସାତେ ମିସ୍‌ନାରି କାମି ହରାସେନ୍‌କେନ୍ ଇମ୍ତା ଥେସଲନିକୀ କାଲିସିୟାକେ ବାଇୟାକାଦ୍ ତାଇକେନା, ପ୍ରେରିତ୍ ୧୭:୧-୧୦ ।

ଚିମିନ୍ ଯିହୁଦୀ ଆତଃ ଚିମିନ୍ ସାଅଁସାର୍ ହଡକଆଃ ହରାତେ ନେ କାଲିସିୟା ବାଇୟାକାନ୍ ତାଇକେନା । ଥେସଲନିକୀ କାଲିସିୟାତାଃତେ ଅଲ୍ଲାକାନ୍ ଚିଟାଉରେ ଶ୍ରୀଷ୍ଟ୍‌ଆଃ ଆତଃମିସା ହିନିଜୁଃ ଆତଃ ରୁଣ୍ଟୁ ଦିପିଲି ବିଷାଏରେ ଅଲ୍ଲାକାନା । ଚିୟାଃଚି ପାଉଲୁସ୍ ଆୟାଃ ବାରାନ୍ ଚିଟାଉରେ ଥେସଲନିକୀ କାଲିସିୟାତାଃତେ ଅଲ୍ଲାକାଦା । ପାଉଲୁସ୍ ଆଲ୍‌ସି ବିଷାଏରେ ଚେଡ୍‌ଗାର୍ ଏମାଃଏ । ମିମିଆଦ୍ ହଡ୍ ଆପ୍‌ନାଃ ଜମେୟାଃ ନାଗେନ୍ତେ କାମି ଲାଗାତିଙ୍‌ୟାଃ, ୩:୬-୧୦ ।

ପୁଅ୍ ଭିଟାରରେ ତାଇକାନ୍ କାଜି

୧. ପାଉଲୁସ୍ ଆୟାଃ ଚିଟାଉରେ ଆୟାଃ ଆପ୍‌ନାଃ ଆତଃ ଗାତିରେ କାମିତାନ୍ ହାଗାକଆଃ ପାରିଟାଏ ଏମ୍‌କେଦ୍‌ତେ ଏନେଚେଦ୍ ରିକାକାଦାଏ । ୧:୧-୨

୨. ଥେସ୍ଵଲନିକା କାଲିସିୟା ନାଗେନ୍ତେ ପାର୍ମେଶ୍ଵାରକେ ଧାନ୍ୟାବାଦ୍ ଏମାଃଏ ଆତଃ ବିନ୍ତି ରିକାଃଏ । ୧:୩-୧୨
୩. ଅତେଦିଶ୍ଵମ୍ରେୟାଃ ଚୁଣ୍ଡ ଦ୍ଵିପିଲି ବିଷାଏରେ କାଜିୟାଃଏ । ୨
୪. ଇନିଃ ଆଲ୍ଵି ବିରୁଧ୍ରେ ଆତଃ କେଟେଦ୍‌କାମି ରିକା ବିଷାଏରେ କାଜିୟାଃଏ । ୩:୧-୧୫
୫. ପାଉଲୁସ୍ ଆତଃମିସା କାଲିସିୟାରେନ୍ ହଡ଼କକେ ଜହାର୍ କାଜିକେଦ୍‌ତେ ଅଲ୍‌ଚୁଣ୍ଡକ୍ଵାଦା । ୩:୧୬-୧୮

୧ *ଆରୁଆଃ ଆପୁ ପାର୍ମେଶ୍ଵାର୍ ଆତଃ ପ୍ରାଭୁ ଯୀଶୁ ଖ୍ରୀଷ୍ଟ୍ରେ ତାଜକାନ୍ ଥେସ୍ଵଲନିକା କାଲିସିୟାରେନ୍ ହଡ଼କତାଃତେ ପାଉଲୁସ୍, ସିଲାସ୍ ଆତଃ ତୀମଥ୍‌ଆଃ ଚିଟାଉ ।

୨ ଆରୁଆଃ ଆପୁ ପାର୍ମେଶ୍ଵାର୍ ଆତଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ସାଃଏତେ ସାୟାଦ୍ ଆତଃ ଜୀଉସୁକୁ ଆପେୟାଃ ହବାଅଃକା ।

ଖ୍ରୀଷ୍ଟ୍‌ଆଃ ହିଜୁଃ ଦିପିଲିରାଃ ବିଚାର୍

୩ ହେ ହାଗା ମିଗିକ, ଆଲେ ଆପେ ନାଜ୍ ସବେନ୍ ଇମ୍‌ତା ପାର୍ମେଶ୍ଵାରକେ ଧାନ୍ୟାବାଦ୍ ଏମ୍ ଲାଗାଡିଙ୍‌ୟାଃ, ଆତଃ ଏନା ଠାଉକାଗିୟା, ଚିୟାଃଚି ଆପେୟାଃ ବିଶ୍ଵାସ୍ ଆତଃଚି ପସା ଇଦିୟଃତାନା, ଆତଃ ଆପେୟାଃ ଦୁଲ୍‌ାଡ୍ ସବେନ୍‌କଆଃ ନାଜ୍ ପୁରାଃଚି ହାରା ଇଦିୟଃତାନା । ୪ ନେ ଲେକାତେ ଆପେୟାଃ ସବେନ୍ ସାସାତି ଆତଃ ଦୁକୁ ଇମ୍‌ତାରାଃ ସାହାଡିଙ୍‌ ଜୀଦାନ୍ ଆତଃ ବିଶ୍ଵାସ୍ ନାଗେନ୍ତେ ଆଲେ ପାର୍ମେଶ୍ଵାର୍‌ଆଃ କାଲିସିୟାକରେ ଆପେୟାଃ ବିଷାଏଲେ ଉଦୁବ୍‌କେଦା ।

୫ ପାର୍ମେଶ୍ଵାର୍‌ଆଃ ବିଚାର୍ ଠାଉକାଗିୟା, ମେନ୍ତେ ନେ ସବେନାଃତେ ସାରିୟଃତାନା ଆତଃ ଏନାତେ ଆପେ ପାର୍ମେଶ୍ଵାର୍‌ଆଃ ରାଜ୍‌ ନାମେ ଲେକାନ୍‌କପେ ହବାଅଆଃ, ଚିୟାଃଚି ଏନ୍ ରାଜ୍‌ ନାମେ ନାଗେନ୍ତେଚି ଆପେ ଦୁକୁପେ ସାହାଡିଙ୍‌ତାନା । ୬ ଠାଉକାନ୍‌ତେୟାଃ ପାର୍ମେଶ୍ଵାର୍ ରିକାୟାଏ, ନାହାଁଃ ଆପେକେ ଅକନ୍‌କ ଦୁକୁ ଏମାପେତାନାକ, ଇନ୍‌କୁକେ ଇନିଃ ଦୁକୁ ଏମ୍ ରୁହାଡ୍‌କଆଏ, ୭ ଆତଃ ଆପେୟାଃ ଦୁକୁ ସାଜିନ୍‌କେଦ୍‌ତେ, ଆଲେକେୟ ଜୀଉରାଡ଼େଃ ଏମାଲେୟାଏ । ନେଆଁ ପ୍ରାଭୁ ଯୀଶୁ,

* ୧:୧ ୧:୧ ପ୍ରେରିଡ଼ ୧୭:୧.

ଆୟାଃ ପୁରାଃ ପେଡେୟାନ୍ ଦୁଁଡକଲଃ ସିର୍ମାହେତେ ହିନ୍ଦୁଃ ଇମ୍ତା ହବାଅଃଆ । ୮ ପାର୍ମେଶ୍ଵାରକେ କା ସାରିତାନ୍କକେ, ଆତଃ ଆରୁଆଃ ପ୍ରାଭୁ ଯୀଶୁଆଃ ସୁକ୍ମକାଜି କା ମାନାତିଙ୍ଗ୍ ତାନ୍କକେ ଇନିଃ ସାଜାଈ ଏମାକ ନାଗେନ୍ତେ ସେଙ୍ଗେଲ୍ ଲେକା ଜୁଲ୍ତାନ୍ ହୁକା ସାବକେଦ୍ତେ ହିନ୍ଦୁଃଆ । ୯ ଏନ୍ ହଡକ ପ୍ରାଭୁଆଃ ହେପାଦ୍‌ହେତେ ଆତଃ ଆୟାଃ ପେଡେୟାନ୍ ମାନାରାଙ୍ଗ୍‌ହେତେ ବିନ୍‌ଗାଅଃତାନ୍‌ଲଃ ଜାନାଅ ଜାନାଅ ନାଗେନ୍ତେକ ଜିୟନଃଆ । ୧୦ ମେନ୍‌ଦ ଏନ୍ ହୁଲାଙ୍ଗ୍ ଇନିଃ ଆୟାଃ ପାବିତାର୍ ହଡକତାଃଏତେ ଆତଃ ସବେନ୍ ବିଶ୍ଵାସୀକତାଃଏତେ ମାଇନାନ୍ ଆତଃ ମାନାରାଙ୍ଗ୍ ନାମେୟାଏ । ଇନ୍‌କୁଆଃ ଆଲାରେ ଆପେୟଗି ତାନ୍‌ପେ, ଚିୟାଃଚି ଆପେ, ଆଲେ ଉଦୁବକେଦ୍ କାଜିରେପେ ବିଶ୍ଵାସକେଦା ।

୧୧ ଏନା ନାଗେନ୍ତେ ଆପେ ପାର୍ମେଶ୍ଵାର୍‌ଆଃ କେନେଡା ଲେକାଗି ଜୀଦାନ୍ ବିତାଏପେ ମେନ୍ତେ ଆଲେ ଆପେ ନାଙ୍ଗ୍ ପାର୍ମେଶ୍ଵାର୍‌ତାଃରେ ଜାନାଅଗିଲେ ବିକ୍ତିତାନା । ଆୟାଃ ପେଡେଃତେ ଇନିଃ ଆପେୟାଃ ସବେନ୍ ବୁଗିନାଃ ଆତଃ ଆପେୟାଃ ବିଶ୍ଵାସରାଃ କାମିକେ ପୁରାଏକା । ୧୨ ଏନ୍‌ଲେକାତେ ଆରୁଆଃ ପ୍ରାଭୁ ଯୀଶୁଆଃ ନୁତୁମ୍ ଆପେରେ ମାନାରାଙ୍ଗ୍ ହବାଅଃକା, ଆତଃ ଆରୁଆଃ ପାର୍ମେଶ୍ଵାର୍ ଆତଃ ଯୀଶୁ ଖ୍ରୀଷ୍ଟ୍‌ଆଃ ସାୟାଦ୍ ଲେକାତେ ଆପେ ଇନିଃରେଗି ମାନାରାଙ୍ଗ୍ ହବାଅଃପେ ।

୨

ଏଡକାନ୍ ହଡ

୧ *ହେ ହାଗା ମିଗିକ, ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ହିନ୍ଦୁଃ ଆତଃ ଆରୁ ଆୟାଃତାଃରେ ହୁଣ୍ଡିୟଃ ନାଗେନ୍ତେ ଆଲେ ଆପେକେ ବିକ୍ତିପେ ତାନାଲେ । ୨ ଆପେ ପ୍ରାଭୁଆଃ ହୁଲାଙ୍ଗ୍ ସେଟେରାକାନା ମେନ୍ତେ ଜେତାଏତାଃଏତେ ଆୟୁମ୍‌କେଦ୍‌ତେ, ଆମ୍‌ରେ ଆଲ୍‌ପେ ଆକ୍‌ବାକାଅଃଆ ଚାଏ ବେଦାଅଃଆ । ଆଲେ ବାଚାନ୍ ହାଟିଙ୍ଗ୍ ଇମ୍ତା ନେକାନ୍ କାଜିଲେ କାଜିକାଦା ଚାଏ ନେ ବିଷାଏରେ ଚିଟାଉଲେ ଅଲ୍‌କାଦା ମେନ୍ତେ ଚିମିନ୍ ହଡକ କାଜିତାନା । ୩ ଜେତାଏ ଆପେକେ ଜେତାଲେକାତେ ଆଲକାକ ବେଦାପେକା, ଚିୟାଃଚି ଚୁଣ୍ଡୁ

☆ ୨:୧ ୨:୧ ୧ ଥେସଲନିକା ୪:୧୫-୧୭.

ମାପାଃତୁପୁଈଈଁ ହବାଅଃଆ ଆତଃ ଏନ୍ ଏଡ଼କାନ୍ ହଡ଼ ଉନ୍ନୁଦୁବଃଆଏ । ଆତଃ ଇନିଃକେ ଜିୟନଃ ନାଈଁ ନାରାକ୍ତେ ଆଉରି ଇଦିୟଃ ଜାକେଦ୍, ଏନ୍ ହୁଲାଈଁ କା ହିଜୁଃଆ । ୪ ଏନ୍ ଏଡ଼କାନ୍ ହଡ଼, ବଈଁାବୁରୁ ସେଞ୍ଜାତାନ୍ ଆତଃ ପାର୍ମେଶ୍ଵାରକେ ସୁସାର୍ତାନ୍ ସବେନ୍କଆଃ ବିରୁଧ୍ରେ ତାଇନା ଆତଃ ଆଇଃକ୍ତି ସବେନ୍କଆଃ ଚେତାନ୍ରେ ତାଇନା ଆତଃ ପାର୍ମେଶ୍ଵାରଆଃ ମାନ୍ଦିର୍ ଅଡ଼ାଃରେ ଦୁବକେଦ୍ତେ ଆଇଈଁ ପାର୍ମେଶ୍ଵାର ତାନିଈଁ ମେନ୍ତେ କାଜିୟା ।

୫ ଆଇଈଁ ଆପେଲଃ ତାଇକେନ୍ ଇମ୍ତା, ନେ ସବେନ୍ ବିଷାଏରେ ଆପେକେ କାଜିକାଦ୍ପେ ତାଇକେନ୍ତେୟାଃ କାପେଚି ପାହାମେତାନା ? ୬ ଆତଃ ଇନିଃଦ୍ ଏଡ଼କାନ୍ ହଡ଼, ଦହାକାନ୍ ଦିପିଲିରେ ଉଦୁବଃ ନାଗେନ୍ତେ ଚିକ୍ନାଃ ଆପେକେ ଛେକାଦ୍ପେ ତାନା, ଏନାଦପେ ସାରିତାନା । ୭ ଚିୟାଃଚି ଏଡ଼କାନାଃରେ ଉକୁଆକାନ୍ ପେଡ଼େଃ ନାହାଁଃହାଁ କାମିତାନାଏ, କାଜିଛେକାଦ୍ତାନ୍ ହଡ଼ ଆଉରି ସାଈଁନଃ ଜାକେଦ୍ ଏନାଏଁ କାମିକାତେୟାଃ । ୮ ଏନ୍ତେ ଆନ୍ରୁ ବାନଃନିଃ ଉଦୁବଃଆଏ, ଇନିଃକେ ପ୍ରାଭୁ ଯୀଶୁ ଆୟାଃ ମତାରେୟାଃ ସାହେଁଦ୍ତେ ଗଜିୟା ଆତଃ ଆୟାଃ ହିନିଜୁଃରାଃ ଜୁନ୍ନୁଲ୍ତେ ଜିୟନିଆ । ୯ ✧ ଏନ୍ ଏଡ଼କାନ୍ନିଃ ସାଏତାନ୍ରାଃ ପେଡ଼େଃଲଃ ହିଜୁଃଆଏ ଆତଃ ସବେନ୍ ଲେକାନ୍ ହସଡ଼ରାଃ ପେଡ଼େୟାନ୍କାମି, ଚିହ୍ନାଁ, ଆତଃ ଆକ୍ଦାନ୍ଦାଅ କାମିକ ରିକାଏୟାଏ । ୧୦ ଆତଃ ପୁରାଃ ହଡ଼କ ଇନିୟାଃ ଏଡ଼କାନ୍ ବେଦାରେ ଜିୟନଃଆକ । ଅକନ୍ ଦୁଲାଡ଼ରେୟାଃ ସାନାର୍ତ୍ତିକେ ତେଲା ଦାରମ୍କେଦ୍ତେ ଇନ୍କୁ ଜୀଉବାଞ୍ଚାଅ ନାମେତେୟାଃକ, ଏନାକେ କା ତେଲା ଦାରମ୍କେଦ୍ ହରାତେ ଇନ୍କୁ ଜିୟନଃଆକ । ୧୧ ଏନାମେନ୍ତେ ଇନ୍କୁ ଜେ'ଲେକା ହସଡ଼ରେକ ବିଶ୍ଵାସେୟା, ଏନାମେନ୍ତେ ପାର୍ମେଶ୍ଵାର ଇନ୍କୁତାଃତେ ପେଡ଼େୟାନ୍ ହସଡ଼କେ କୁଲ୍କେଦା । ୧୨ ଏନ୍ତେ ସାନାର୍ତ୍ତିରେ କା ବିଶ୍ଵାସକେଦ୍ତେ ପାପ୍ କାମିରେ ସୁକୁନାମେତାନ୍ ସବେନ୍କ ସାଜାଇକ ନାମେୟା ।

ଆପେ ଜୀଉବାଞ୍ଚାଅ ନାମେ ନାଗେନ୍ତେପେ ସାଲାକାନା

୧୩ ମେନ୍ଦ୍ ହେ ପ୍ରାଭୁଆଃ ଦୁଲାଡ଼୍ ହାଗାକ, ଆଲେ ଆପେ ନାଗେନ୍ତେ ସବେନ୍ ଇମ୍ତା ପାର୍ମେଶ୍ଵାରକେ ଧାନାବାଦ୍ ଏମ୍

✧ ୨:୯ ୨:୯ ମାଥୁଉ ୨୪:୨୪.

ଲୀଗାତିଙ୍ଗଂୟାଃ । ଚିୟାଃଚି ପାବିତାର୍ ଆମ୍ବାରାଃ ପେଡ଼େଃଡେ,
 ଆଡ଼ଃ ସାନାର୍ଚ୍ଚିରାଃ ବିଶ୍ଵାସ୍ତେ ଜୀଉବାଞ୍ଚାଅ ନାମେ ନାଗେନ୍ତେ
 ପାର୍ମେଶ୍ଵାର୍ ଆପେକେ ମୁନ୍ନୁଏତେ ଆୟାଃ ପାବିତାର୍ ହଡ଼ ମେନ୍ତେ
 ସାଲାକାଦ୍‌ପେୟା । ୧୪ ଆଲେ ଆପେତାଃରେ ଅକନ୍ ସୁକୁକାଜି
 ଉଦୁବ୍‌କାଦାଲେ, ଏନା ହରାତେ ପାର୍ମେଶ୍ଵାର୍ ଆପେକେ ଏନ୍
 ସୁକୁକାଜି ନାଗେନ୍ତେ କେଡ଼ାକାଦ୍‌ପେୟା । ଆବୁଆଃ ପ୍ରାଭୁ ଯୀଶୁ
 ଖ୍ରୀଷ୍ଟୁଆଃ ମାନାରାଙ୍ଗ୍‌ରେୟାଃ ହିସା ହବାଅଃ ନାଗେନ୍ତେ ଇନିଃ
 ଆପେକେ କେଡ଼ାକାଦ୍‌ପେୟା । ୧୫ ଏନା ନାଗେନ୍ତେ, ହେ ହାଗା
 ମିଶିକ, ଆଲେୟାଃ ଇନିତୁ ଆଡ଼ଃ ଆଲେୟାଃ ଅନଲ୍‌ତେ ଆପେ
 ଇଡୁକାନ୍‌ତେୟାଃ ତିଙ୍ଗୁ କେଟେଦ୍‌କେଦ୍‌ତେ ସାବାକାପେ ।

୧୬ ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟୁ ଆଇଃକ୍‌ଗି ଆଡ଼ଃ ଆବୁଆଃ
 ଆପୁ ପାର୍ମେଶ୍ଵାର୍ ଆବୁକେ ଦୁଲାଡ଼କେଦ୍‌ତେ ଆୟାଃ ସାୟାଦ୍
 ହରାତେ ଆବୁକେ ଜାନାଅଗି ଜୀଉରାଡ଼େଃ ଆଡ଼ଃ ବୁଗିନ୍ ଆସ୍ତା
 ଏମାକାଦ୍‌ବୁଆଏ, ୧୭ ଇନିଃ ଆପେକେ ସବେନ୍ ଇମ୍‌ତା ବୁଗିନ୍ କାମି
 ନାଗେନ୍ତେ ଆଡ଼ଃ ସାର୍‌ତି କାଜି ନାଙ୍ଗ୍ ପେଡ଼େଃ ଆଡ଼ଃ ଜୀଉରେ
 ରାସ୍‌କା ଏମାପେକାଏ ।

୩

ଆଲେ ନାଗେନ୍ତେ ବିକ୍ତିପେ

୧ ହେ ହାଗା ମିଶିକ ଚୁଣ୍ଡୁର ଆଲେ ନାଙ୍ଗ୍ ବିକ୍ତିପେ, ପ୍ରାଭୁଆଃ
 କାଜି ଆପେତାଃରେ ନିତିର୍‌ୟାନ୍* ଲେକାଗି ଏନା ଚାରିୟସାଃରେ
 ନିତିର୍‌କେଦ୍‌ତେ ମାନାରାଙ୍ଗ୍ ହବାଅଃକା । ୨ ଆଡ଼ଃଗି ବିକ୍ତିପେ,
 ପାର୍ମେଶ୍ଵାର୍ ଆଲେକେ ଏଡ଼କାନାଃଏତେ ଆଡ଼ଃ ଏଡ଼କାନ୍
 ହଡ଼କତାଃଏତେ ବାଞ୍ଚାଅଲେକାଏ, ଚିୟାଃଚି ସବେନ୍‌କ ସୁକୁକାଜିରେ
 ବିଶ୍ଵାସୀ ନାହାଁଲାକ ।

୩ ମେନ୍‌ଦ ପ୍ରାଭୁ ପାତିୟାର୍‌ରଃନିଃ ତାନିଃ, ଆଡ଼ଃ ଇନିଃ ପେଡ଼େଃ
 ଏମାପେୟାଏ, ଏନ୍ତେ ଏଡ଼କାନ୍ ହଡ଼ଏତେ ବାଞ୍ଚାଅପେୟା । ୪ ଆଡ଼ଃ
 ଆଲେ ଆପେକେ ଆବୁକାଦ୍‌ପେଡେୟାଃ ସବେନାଃପେ କାମିତାନା
 ଆଡ଼ଃ କାମିୟାପେ, ମେନ୍ତେ ଆଲେ ପାର୍ମେଶ୍ଵାର୍‌ତାଃରେ ଆପେୟାଃ
 ବିଷାଏରେ ପୁରାଃ ବିଶ୍ଵାସ୍ ମେନାଃ ।

* ୩:୧ ୩:୧ ପାସରାଅ

୫ ପ୍ରାଭୁ ଆପେୟାଃ ମନ୍‌ସୁରୁଦ୍‌ରେ ପାର୍‌ମେଶ୍‌ବାର୍‌ଆଃ ଦୁଲ୍‌ଭ୍, ଆଡ଼ଃ ଖ୍ରୀଷ୍ଟ୍ ଏମାକାଦ୍ ସାହାତିଙ୍‌କ୍‌ୟ୍‌ଲ୍‌ ଲେକାନ୍ ହରାରେ ସୁଭୁଃ ଇଦିପେକା ।

ସବେନ୍ କାମି ରିକା ଲାଗାତିଙ୍‌କ୍‌ୟ୍‌ଃ

୬ ହେ ହାଗା ମିଶିକ, ଆଲେ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ନୁତୁମ୍‌ତେ ଆରୁପେ ତାନାଲେ, ଜେତାଏ ହାଗା, ଆଲେତାଃଏତେ ନାମାକାଦ୍ ଇନିତୁଲେକା କା ସେସେନ୍‌କେଦ୍‌ତେ ଆଲ୍‌ସି ଜୀଦାନ୍ ବିତାଅତାନ୍‌ରେଦ୍, ଇନିଃତାଃଏତେ ସାଙ୍‌ଜିନ୍‌ରେ ତାଇନ୍‌ପେ ।

୭ ଆପେଦ୍ ଚିଲ୍‌କାତେ ଆଲେକେ ଅତଙ୍‌ ଲାଗାତିଙ୍‌କ୍‌ୟ୍‌ଃ ଏନା ବୁଗିଲେକାପେ ଇତୁକାନା, ଆଲେଦ୍ ଆପେଲଃ ତାଇକେନ୍ ଇମ୍‌ତା ଆଲ୍‌ସି କାଲେ ତାଇକେନା । ୮ ଆଡ଼ଃ ବେଗାର୍ ଗନଙ୍‌ତେ ଜେତାଏତାଃରେ କାଲେ ଜମ୍ ତାଇକେନା, ମେନ୍‌ଦ୍ ଆପେତାଃଏତେ ଜେତାଏୟାଃ ବାହାରମ୍ ଲେକା ଆଲକାଲେ ଲାଦିୟଃ ମେନ୍ତେ ଦୁକୁ ସାହାତିଙ୍‌କ୍‌ତାନ୍‌ଲଃ ନିଦା ସିଙ୍‌ ପୁରାଃ କେଟେଦ୍ କାମିଲେ କାମି ତାଇକେନା । ୯ ଆପେତାଃଏତେ ଜେତୁନାଃ ନାମେ ନାଗେନ୍ତେ ଆଲେୟାଃ ଆକ୍‌ତେୟାର୍ ବାନଃଆ ମେନ୍ତେଦ୍ କା, ମେନ୍‌ଦ୍ ଆପେ ଆଲେକେ ଅତଙ୍‌ଲେପେ ମେନ୍ତେ, ଆଲେ ଆପେତାଃରେ ନାମୁନା ଲେକା ବାଇୟେନ୍ ନାଗେନ୍ତେଲେ ରିକାକେଦା । ୧୦ ଚିୟାଃତି ଆଲେ ଆପେଲଃ ତାଇକେନ୍ ଇମ୍‌ତାଗି ଆପେକେ ନେଆଁ ଆରୁକାଦ୍‌ପେ ତାଇକେନାଲେ, ଜେତାଏ କା କାମି ସାନାଙ୍‌ତାନ୍‌ନିଃ ଆଲକାଏ ଜମେକା ।

୧୧ ଆଲେ ଆପେକେ ନେଆଁ କାଜିପେତାନାଲେ, ଚିୟାଃତି ଆପେ ଆଲାରେ ଚିମିନ୍ ହଡକ ଆଲ୍‌ସି ଜୀଦାନ୍ ବିତାଅତାନ୍‌ଲଃ ଏଟାଃକଆଃ କାମିରେ ଥାଲା ଥାଲାଅଃତାନାକ ଆଡ଼ଃ ଜେତୁନାଃ କାକ କାମିତାନା, ମେନ୍ତେଲେ ଆୟୁମେତାନା । ୧୨ ଏନ୍ ଲେକାନ୍ ହଡକକେ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ନୁତୁମ୍‌ତେ ଚେତାଅକେଦ୍‌ତେଲେ ଆରୁକତାନା, ଇନ୍‌କୁ ଆକଆଃ ଜୀଦାନ୍‌ରେ ସୁକୁରେ ତାଇନ୍‌କେଦ୍‌ତେ ଆକଆଃ ଜମେନାଙ୍‌କ କାମିକା ।

୧୩ ମେନ୍‌ଦ୍ ହେ ହାଗା ମିଶିକ, ବୁଗିନ୍ କାମିରେ ଆଲ୍‌ପେ ଲାଗାଅଃଆ । ୧୪ ଆଡ଼ଃ ଆଲେ କୁଲାକାଦ୍ ନେ ଚିଠିରେୟାଃ କାଜି କା ମାନାତିଙ୍‌କ୍‌ତାନ୍‌କକେ ନେଲ୍ ଉରୁମାକାକପେ, ଆଡ଼ଃ ଇନ୍‌କୁ

ଗିହୁଗଠକାକ ମେନ୍ତେ ଆପେ ଇନ୍‌କୁଲଃ ଆଲ୍‌ପେ ମେସାନା ।
 ୧୫ ମେନ୍‌ଦ ଇନ୍‌କୁକେ ବାଇରି ଲେକା କା ନେଲ୍‌କେଦ୍‌ତେ ଖ୍ରୀଷ୍ଟ୍
 ବିଶ୍ଵାସୀ ହାଗାଲେକା ମନେତାନ୍‌ଲଃ ଚେତାଅକପେ ।

ଚୁଣ୍ଡ କାଜି

୧୬ ଅକନ୍ ପ୍ରାଭୁ ଆବୁଆଃ ଜୀଉସୁକୁ ଏମଃନିଃ ତାନିଃ, ଇନିଃ
 ଆପେକେ ସବେନ୍ ଇମ୍‌ତା ଆଡଃ ସବେନ୍ ଲେକାତେ ଜୀଉସୁକୁ
 ଏମାପେକାଏ । ପ୍ରାଭୁ ଆପେ ସବେନ୍‌କଲଃ ହବାଅଃକା ।

୧୭ ଆଇଙ୍ ପାଉଲୁସ୍, ତିଃଇ ତାଇୟାଃତେ ଅଲ୍‌କେଦ୍‌ତେଇଙ୍
 ଜହାର୍‌ପେତାନା, ନେ ଲେକାଗି ସବେନ୍ ଚିଠିକରେ ଚିହ୍ନା ଲେକାଇଙ୍
 ଅଲେଡାନା ।

୧୮ ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ସାୟାଦ୍ ଆପେ ସବେନ୍‌କଲଃ
 ହବାଅଃକା ।

ପାରମେଶ୍ଵାରଆଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵାରଆଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଡା (Muṅḍa) (Munda)

Contributor: The Word for the World International

ପାରମେଶ୍ଵାରଆଃ ଜୀନିଦ୍ ବାଚାନ୍
ନାଞ୍ଜା ନିୟମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6